

灌志文徵卷十

七言古詩下

題朱霽軒桂庭集

衛道凝

岷山自古稱靈異，崑崙一脈西南萃，何爲范友賦歸來，此地聞人亦
遐棄，賴有道將擅史才，精心撰述華陽志，蠶叢以降備蒐羅，尤於
耆宿三致意，嗟予晚出志頗同，懷槩每訪鄉先輩，炳靈江漢載英多
，底事青城人寡二，偉哉霽軒桂庭集，捫參歷井何閔肆，翛然高識
卓不羣，斯道於今猶未墜，自從利祿薰人心，應試文章誇極致，但
及閩洛一家言，頻遭白眼爲短氣，猶此生平學道心，默默無言唯自
喻，人見遇酒卽酩酊，人見逢場還作戲，豈知真性不可磨，鐵石芝
蘭皆臭味，同是心期不朽人，寧與悠悠一例視，玉壘磅礴雲氣多，

灌志文徵

卷十 七言古詩下

當有賢豪產其地，與公同在岷山陽，果得山靈鍾毓未，側身懷古意
蹉跎，書罷惶然懼且愧，

中興場輿梁落成

宋 煊

百尺洪濤數里灘，行人太息空波瀾，臨流欲渡無舟楫，瞥見輿梁橫
江干，不有好善捐金助，往來疇不嗟徒步，迄今風靜浪無聲，蕩平
穩過雲衢路，形勢遙從玉壘聯，好將華表鎮江關，定知有客題橋柱
，詠徧青城指顧間，

永續菴羅漢松

譚 岱

人生事業漚夢幻，百年一瞥空浩歎，身前身後本來無，子孫永續有
誰見，陳公已死三百年，田宅至今無更變，田爲常住宅爲菴，覩物
懷人猶覩面，公號空門手植松，松可替公作羅漢，丈六金身終不墮

，護法門前發至願，是松是公我弗知，睹物懷人早欣羨，友人邀我再三來，摩挲感喟情無限，證得菩提因此松，萬古風霜長歷鍊，

楊妃池

山春

蜀州司戶楊氏女，小字玉環嬌如許，未得春寒浴華清，先將勺水凝脂洗，梳妝台畔草離離，灌口而今尙有池，生長岷山誇一代，愛他承詔作妃時，靈源淡蕩春鶯語，肌膚冰雪若仙子，凌波微步襪生塵，羅巾拂拭芙蓉水，侍兒扶起不勝衣，回頭一笑柳眉飛，蒼茫自覺烟波好，艷麗無雙媚曉暉，輕盈不似趙飛燕，香入沈沈波一片，可憐滿殿倚新妝，不及佳人容落雁，施朱太赤粉太白，如此容顏真國色，當年待字三夫人，盛名相隨在他側，雲想衣裳花想容，春生玉壘亦憐儂，蜀中遺此導江路，人憶瑤臺月下逢，不識爾時赴京未，

灌志文徵

卷十 七言古詩下

二

焉知後日馬嵬罪，一從剪髮擅宮闈，池水清冷荒草廢，我年十五過池邊，但有餘香不見仙，千古芳名留此水，人情猶覺艷山川，

落花詩

周益

五更夢破百花裏，鶗鴂一聲催人起，留春不住將奈何，落花片片隨流水，憶昔良辰霜滿天，淡紅慘白爭春妍，三點兩點杏花雨，千絲萬絲楊柳烟，鎮日尋春復問柳，朱顏競對金尊酒，只恐金尊酒易空，那知眼底花難久，人面如花花自羞，花氣襲人人更愁，銀燭未燒先墮淚，錦衾初展又回頭，可憐花命生成薄，無雨無風花自落，那堪風雨更摧殘，一片春心何處託，此時蝴蝶夢已迷，此時杜宇泣長啼，桃葉渡頭雲黯黯，竹枝歌裏聲淒淒，淒淒寂寂增離思，對鏡低誦傷春句，花枝別我亦銷魂，胭脂臉帶胭脂淚，淚痕紅染羅衫輕，

一段春愁愁不醒，當時錯打催花鼓，而今空護繫花鈴，含愁含怨復含情，恰似綠珠別季倫，玉笛吹殘香夢破，半空飛下墜樓人，又如妃子傾城色，清歌妙舞君王側，一朝婉轉繫羅裙，君王掩面救不得，吁嗟乎，我思美人心更傷，我對名花愁更長，安得花枝長好人長壽，百年大笑三萬六千場，

伏龍觀觀漲

宋樹森

靈潭夜夜蛟龍吼，巨浪盤空石欲走，破曉江頭壯大觀，洪濤一線衝峽口，我聞蜀守鑿離堆，兩峯劈破勢崔嵬，岷沱至此畫南北，寶瓶倒瀉轟如雷，昨夜西山添猛雨，萬壑千崖奔如許，獨流萬派注清江，勢若馬陵飛箭弩，江岸人家瓦屋鳴，擲玉跳珠聽未清，俯瞰銀山千萬疊，掀波激浪走長鯨，觀罷掉頭山色紫，鴉聲未了鐘聲起，寺中老衲煎茶來，澆腸若飲曹溪水，

灌志文徵

卷十 七言古詩下

三

節孝詩

蔡國楨

綸緯閣中誰不朽，筠姿耐雪最長久，蘭心蕙質世所傳，苦節無如陳氏母，卓哉巾幗有賢良，寡鵠離鸞影自傷，上侍高堂兼子職，養生送死相扶將，下爲單門撫孤子，一綫宗支賴有此，頑角不凡器早成，垂髻初弁騰泮水，早歲服官在蓉城，留得芳名書國史，茹蓼五旬及黃泉，懷清臺高永不死，我聞淮陽陳孝婦，終身養姑潔甘旨，又聞廣漢廖貞姬，不作春花隨風靡，志堅金石更育孤，大節稱賢無此比，况復賢如鄧母慈，後嗣克家爲俊士，敬奉芳魂入孝祠，歲歲春秋薦藝芷

安瀾橋

楊均

波濤洶湧相擊搏，岸闊江深惟搆索，果然人巧奪天工，百丈長橋善斟酌，到此人如履薄冰，動魄驚心難立脚，臨河返駕亦有人，或謂前朝太守作，豈知平坦非險艱，高視闊步尤足樂，人畏簸揚悉戰兢，我因飛舞彌踴躍，中流舉目望羣山，羣山壁立都如削，俯瞰波濤吼若雷，蛟龍來往相棲託，吁嗟乎，到此飄飄真欲仙，宛似雲中能跨鶴，往來萬古濟行人，迴首灌城看隱約

同李玉瑋登盩華山放歌

王昌南

癸亥之年月己未，高臥羲皇忘漢魏，李君爲約登盩華，擬覓仙踪探道味，聞雞起舞欲曉天，著鞭常恐祖生先，飯罷晨餐載行李，單衣蠟屐足膝纏，窄橋虹飛跨大河，沿河直上青杠坡，古牛崗頭石磴險，濃陰夾道樹婆娑，千盤百折上熊耳，野店茅亭暫憩止，狂猋颯颯

灌志文徵

卷十 七言古詩下

四

拂面來，烈日當空清如水，汗消喘息更前行，行行且止竹林深，林深徑狹差容足，山高野禽不敢鳴，隔林但聞人語響，木磴高懸絕壁上，取次攀登漸入雲，俯首接膝那可仰，寸腰岩聞鐘磬矣，勗首山巔僅尺咫，鳥道那識多縈迂，崎嶇尙隔十餘里，龍鍾入寺夕陽斜，整衣謁佛香雲遮，謁罷相携登樓望，樓高極目到天涯，頓覺神清眼界空，千古河山一覽中，人生不獲登仙境，那知造化妙無窮，蟠龍趙公相並峙，仙人縹緲綵雲裏，金鞭高矗儼門戶，青城俯伏供指使，晚霞燦爛無遮障，茫茫白水咸東向，暮烟倏忽散成雲，皎皎明月來天上，四面雲山一片白，銀河耿耿霄脈脈，神恬興逸壯思飛，恨不兩肩生六翮，恍然若悟無塵思，萬象空兮灰勢利，此身淡蕩若浮雲，忽聞客子談往事，川原幾度烽火紅，滿照狼煙萬里空，入夜登

樓不忍望，愁雲黯黯起悲風，我對清輝渾忘寐，偶聞此語心如醉，
憶昔豺狼任縱橫，令我頻滴蒼生淚，幸有將軍楚中來，擾擾妖氛一
掃開，藍李摧殘怪石沒，至今猶見蜀江隈，眺賞未竟且徘徊，崆峒
山裏霧成堆，天際方驚月色薄，峯頭忽訝走轟雷，風雨驟兮聲淅淅
，天地暝兮雲寥寥，古寺深兮夜沉沉，佛燈黯兮人寂寂，巨浪驚兮
水瀾漫，涼颺吹兮衣裳單，危風高兮氣條變，酷熱消兮六月寒，寒
暑倏更堪詫怪，蒼茫杳靄真仙界，何人自昔穿雲來，神宇創新千古
快，客子爲言張居士，斬棘披荆覓基址，虎狼驅逐鶴飛來，仙山至
令人仰止，吁嗟居士今何處，創構當年應神助，寺前遺墓草蕭疏，
年年慕側空來去，去來謁墓莫咨嗟，仙人羽化入仙家，古迹紛紛談
未已，道人忽邀飯胡麻，胡麻飯兮瓊酥酒，飲且食兮神抖擻，狂歌

灌志文徵

卷十 七言古詩下

五

醉舞天地空，茫茫塵海更何有，席罷殷勤復置榻，夢魂飛兮風颯颯
，忽逢仙客五雲中，攜手懽然相問答，手把芙蓉身騎鶴，邀我玉京
雲生脚，九垓汗漫乍回頭，莽莽乾坤空碧落，景方豁兮夢魂清，鐘
條鳴兮夢魂驚，夢魂驚兮夜方半，此身猶覺伴蓬瀛，樓閣玲瓏仙氣
爽，依兮身在雲端上，披襟起顧四渺茫，惟見明月天心朗，

橫河堰望水

劉清彥

水從灌西來，發源於玉壘，不見故鄉人，但見故鄉水，故鄉水亦親
，堪慰故鄉身，直以異鄉水，聊作故鄉人，太息水去不復返，較我
離鄉途更遠，誰更作汝故鄉人，令我望洋滋繾綣，

光緒辛巳端午大風

徐昱

我家錦城西，相望一百里，地饒天氣和，萬物蒼繁祉，昭代威德及

邊陲，五風十雨無愆期，辛巳端午日將沒，萬山陰霾雲四合，狂風披猖自北來，林木如麻被摧拉，婆娑大樹數十圍，拔根擲地何崔巍，小樹拱把乃無數，披靡塞路屋瓦飛，茅舍頃刻捲之去，磚牆石坊爲顛仆，存者飄搖人驚疑，况復冰雹雨如注，陡然平地起波瀾，漂泊居民水勢駛，白沙江上數百家，招魂何處奠芳醴，或見空中有人馬，旌旗劍戟紛紛下，或見岷江走蛟龍，驚濤急湍氣朦朧，我聞峨眉夜初更，風聲撼地雜雨聲，三更已到渝城下，客船震盪皆顛傾，是孰吹噓狂且速，三千里外如轉軸，吁嗟乎，尋常風雹不過十里五里間，毋乃彼蒼有意驚當局，階文地震陷且深，去年今年相接續，敬和王宮午明府夢遊青城山留別士民原韻

徐昱

藉問青城三十六峯誰爲主，地屈衝繁民瘠苦，明府蒞灌未一年，忽

灌志文徵

卷十 七言古詩下 六

聞欲去民心阻，二十年來誰好官，口碑篆刻心盤桓，陳情欲向大府乞，攀援不得爲長歎，雞鳴犬吠達四境，堂簾之高不可請，古豈真有桃花源，但願逍遙雲外景，青城在何處，茫茫鎖煙霧，中有仙人引手招，利名纏身如局部，明府遙望心往還，高談風月笑痴頑，袖中滔滔捲東海，五嶽羅胸有名山，憂名忘却長生訣，五夜沿鄉拂馬埒，山靈應惜使君勞，鶴馱相邀鸞車掣，高叱六甲排六丁，瓊樓玉宇笙歌聲，爲展金箋一百束，麻姑伸爪代筆耕，明府致詞吾餘事，廣陵散後八行字，爲彈一曲清風生，聞者能換凡骨去，明府感格由至誠，古來廉吏多清貧，關心民瘼無暇晷，夢遊青城鬼神驚，一百八景豈云窄，風雨離合千嶂黑，指顧徘徊胸臆間，郵亭留別清興發，錦城飛檄天外來，斯民喁喁深離懷，樽酒陽關爲持贈，明府揮之

不肯聽，若忘民心真愛己，五馬征車晨料理，征車出城人不知，獨留教養在赤子，吁嗟乎，獨留教養在赤子，丁公祠前桃與李，好縣官，長不死，

飛龍鐵爐歌

爐在上皇觀唐金華玉真兩公主修煉處志載唐金華宮與上皇觀相近然已無考同治初廟中掘地爐始出識者知爲公主舊物則廟基卽金華宮無疑矣道士因丐詩

徐昱

金華公主真金仙，不處京師居山巔，遠謝繁華鍊汞鉛，飛昇金闕歲月遷，雕軒朱檻皆渺然，神爐埋土五百年，偶爾掘地置庭前，煥章道士心通玄，摩挲洗刷認雕鐫，皇家法器龍飛天，夏商鐘鼎比精妍，雨淋日炙光彩鮮，殿宇滅沒鐵爐堅，從來訪古勝蹟傳，故基排比如雲連，

老人村

陳桂林

灌志文徵

卷十 七言古詩下

七

青城山週八百里，石洞丹房碧雲裏，中有一村名老人，渴飲金漿老不死，老人已老不知年，世外別有壺中天，同住一村無少長，數家雞犬翠微巔，當時採藥相緣入，冷翠嵐光衣上濕，流水空山見落花，芳草斜陽煙際立，初行竹裏淨無塵，行盡花間不見人，遙看一簇攢雲樹，隱隱溪橋隔溪霧，竹籬茅屋自成村，夾岸穿花知有路，一溪橫過一橋通，沿村無數牡丹紅，深巷入林聞犬吠，數家門掩淡煙中，老人出見遽留宿，山月入窗映松竹，爲具雞黍見兒孫，更出嬰孩蒸已熟，座客無言心暗傷，是真未達不敢嘗，老人相勸手分割，全家飽啖喜欲狂，須臾食訖笑開口，云是肉芝藏已久，深山松下茯苓精，今出供客本非偶，客聞此言乃大驚，梅逢仙藥不知名，老人老人天上星，知爲隱逸爲仙靈，朝辭老人出門去，煙中不辨花多處

，回頭但記入山深，前村豈是桃花林，三十六峯青不斷，欲問老人何處尋，

游盤龍山歌答桃源洞天主人

王昌麟

桃源主人示我盤龍吟，動我升高眺遠之雄心，馬背不如人背穩，跨之可上崑崙岑，主人好游意超邁，導我乘雲觀上界，隨處溪山百丈圖，旋行旋展天守快，偕吾徒焉山之脊，撥草尋途愁徑窄，當頭隱疊翠嶂凡幾重，兩面削成丹崖約千尺，蒼茫四望無人家，飢腸轆轤何所覓，食兮渴，又無茶，籐密畏逢蛇吐舌，風腥疑有虎磨牙，同人相顧色如墨，百丈竿頭住不得，麟也胡爲走大荒，鳳兮何苦尋荆棘，有時風落孟嘉帽，有時泥陷阮孚屐，有時汗透左思衣，有時喘坐米顛石，山雨欲來雲黯黯，路轉難時須放膽，昌黎不合哭華山，

灌志文徵

卷十 七言古詩下

八

取笑千秋吾豈敢，體雖疲焉神則王，掉頭已在青雲上，飛雪來迎謝客兒，長風吹送陶元亮，山高寺冷無人到，四時冰雪堆堂奧，僧知客爲觀日來，預言曉霽當先報，我偕弟子臥禪室，遲明僧報日將出，天邊萬道霞繽紛，山外平鋪雲滃滴，初吐赤若眉，繼似朱塗額，俄見碧牙璜，瞬成血色璧，楚王渡江萍實浮，獅子擎空火毬擲，偉哉造化爲大爐，鑄出銅鉦掛東嶧，此行何異登岱宗，低頭俯見海波裂，山僧顧言此未足，霧銷可見峨山曲，芙蓉城郭在眼前，江流如綫纏巴蜀，縱橫平壤天府寬，坐見嘉禾黃轉綠，羣峯峨伏不礙眼，始知井蛙自局促，我聞此語心顏開，準擬看山不擬回，試登混元頂，再上會仙臺，雞冠石上走一過，寶頂山頭覽九垓，眼界更無風隔斷，心光且與天徘徊，天公眞而未易露，勾留苦受白雲錮，主人褰

裳不肯住，予亦從之覓歸路，進易退難古所嘆，此身恨不生羽翰，天梯無磴失欄杆，下視纍纍亂石亂，亂石如錐起，搖搖行復止，履厚指尖長，一滑痛徹髓，翠微直下坡路蠹，風雨漫天霧迷日，綠草蒙茸踏作泥，前人方起後人仆，衣裳濕盡無一乾，雨釀夏氣成秋寒，飛鳥不見見應笑，昨何矯健今蹒跚，自從行路無此苦，荒山誰與爲賓主，兜鞋十步九艱辛，拄杖一搖三仰俯，想是仙人厭客尋，不然山鬼敢余侮，道遇少年胡，采藥上山屨，感激顧盼間，弛擔負余趨，下山投親宿，紅日照庭梧，回瞻所過嶺，雨氣尙模糊，喟然長嘯添神智，安見登高勝平地，便使天門誅蕩開，羣仙轉恐憂顛墜，劉伶荷鍾自可埋，畢卓抱甕何嫌醉，憶我七上公車時，出雲入雲一遊戲，主人吾宗之耆英，新詩贈我如瑤瓊，天上綠章倘可奏，翩然

灌志文徵

卷十 七言古詩下

九

亦欲騎長鯨，功成再訪赤松子，相與盤龍高處證前盟，

不山山人歌

王昌麟

男兒生不爲將相，居游當在名山上，安能不將不相復不山，自低顏色就塵寰，異哉賈生乃以不山名，掉頭不顧山靈驚，此心許山山不信，今我作歌言其情，往者蜀民忽爭路，買刀賣犢紛無數，提捐截餉學官家，懦民縮項強民怒，充衢豺虎齊作態，磨牙吮血無遮碍，山人大笑爾胡然，風雷過後青天在，山人有時入山去，羣魚隨龍爭走避，山人有時出山來，百鳥隨鳳鳴啾啾，山人從此不山居，近市何嫌有寓廬，煮茗自迎空谷駕，添香補讀少年書，我與山人初訂交，歲寒三友同遊遨，探梅伴竹各有願，山人願與松爲曹，竹標清節梅弄春，惟有長松肯覆人，暇日山頭試相訪，木仙疑汝是前身，

和駱成驥同學青城詩

劉咸榮

廿年不到青城峯，夢中雲氣盤蛟龍，詩思遙遙隔天外，至今蒼翠餘胸中，誦君佳什心神開，儼然眼底羣山來，詩境玲瓏照積雪，淡入太古無纖埃，畫意仙心談妙理，能使山靈笑而起，令我神遊最高峯，搔手問天無語，入山入世兩不知，仁靜智動匪所思，人外之遊胡可得，先生自疑我亦疑，笑我浮生逼衰老，小園花鳥聊與娛，不讀昔賢醉鄉記，還誦故人青城詩，

謁二王祠感題

李世瑛

丈夫不作息息嘆，於天下事無不辦，誰謂太守二千石，不能爲民捍大患，李公治水後人師，鑿山導江心力疲，豈料功成卽血食，天地鬼神實相之，從來除害必興利，此事未可期俗吏，聰明正直而爲神，山川效順百靈避，我來逃暑趨靈宮，滿山松柏生英風，父子巍然共俎豆，啓賢禹聖平成功，古今不過數大事，澤流萬者精誠通，吁嗟乎，巖疆亦有農田水利在，我獨胡爲不救斯民飢溺中，

離堆觀漲

楊作勳

江水來自二千里，梁州奔放流無底，離堆震撼湧波瀾，神蛟毒鱷江中起，潰積百萬化爲魚，激盪無情若洪水，錦江泛溢瀉夔門，旋看蜃樓成海市，神武李公秦太守，鑿開混沌分水走，消除無限禍災生，直鎖猛龍如馴狗，嗣後歲歲歌豐年，九支水灌西川田，當時殺羊四五萬，今用隻雞酬神仙，灘聲數里聞喧豗，似見羣魚蜿蜒來，莽蒼入洞拗怒息，須臾漲吼聞驚雷，艤艫難濟桴能進，古觀排開背水陣，偷閒好共數年居，十丈紅塵心鎮定，我復憐龍爲龍語，海宇寬

灌志文徵

卷十 七言古詩下 十

兮凌霄舞，何必驕橫爲患等虎彪，千載幽棲爾亦苦，姑且爲爾破牢籠，飛去漫天作雲雨，風平浪靜人安堵，不然銅此屈蠖同蛇鼠，

烈婦行

陳大慶

照耀乾坤不磨滅，孝子心與忠臣血，成仁奚必定男兒，巾幗雅能伸氣節，吳家淑媛楊家婦，結褵蓬華爛禮數，正己而後堪正人，直言豈料逢彼怒，惟誠阿兄迷狹邪，莫效踰牆蝶戀花，苦備纒積錢幾許，改行方可望成家，兄愚遽將泄所私，暗囑構陷毒計施，邀來悍潑女三五，反唇誚嘗挑母慈，鶯拿燕喙羣肆虐，頓令髻鬟雲滅綠，維時春暮求柔桑，婦獨嬌啼橫罹屈，既遭醜毆并訕謗，叢集枉誣倩誰諒，連番忿激欲捐生，姑老夫賢且留養，其奈曉曉讒口多，難禁午夜起悲歌，紅顏拚死心已決，不可轉也如石何，香闈永別淚漣漣，

灌志文徵

卷十 七言古詩下

十一

雙眉鎖翠恨攢山，一線金刀飛白鍊，血痕盡變桃花斑，非無眷屬力挽救，毅志慘情出於驟，苟活終憂玉染瑕，裁之以正挺閨秀，鴻毛乍比邱嶽重，貞操特樹人爭頌，好擎正軌峙坤維，天高坊壘恩綸奉，羞殺淫娃及狂且，犬豕弗若胡爲乎，弱質慷慨存廉恥，用以兼勵頑懦徒，君不見少婦韓姓昔埋冤，霄小媒孽禍機延，屢次訴人事不白，當場剖腹衆悲酸，又不見王氏女完勝男子，終鮮兄弟進甘旨，敬奉高堂畢餘年，然後潔身自盡耳，一則從容一急切，全貞全孝志各別，臨危引決只須臾，今更風聞烈婦烈，

登奎光塔

楊作勳

既不能如列子馭長風，放眼遙觀東海東，又不能如仙人騎黃鶴，飄然兩翼凌虛空，便當獨立縹緲之絕頂，一覽空闊盡寰中，我家舊居

灌陽水，左有靈巖右玉壘，天風吹我出城東，一塔高標插雲裏，蜿蜒直上最高層，舉脚始信天可登，茫茫元氣混宵漢，俯瞰八荒如游塵，倏然掉臂觀山谷，霧嶂煙巒氣磅礴，青城丈人雲外招，萬樹松風一聲鶴，側聞中有軒皇臺，琪花瑤草覆金塔，青鸞捧輶虹作鞞，山鬼潛逃五嶽來，大江滾滾日東走，直出夔門奔峽口，拍天巨浪聲喧豕，蛟龍駭怒雷霆吼，男兒身當萬里遊，東躡秦岱北幽州，黃鶴樓頭吹鐵笛，蓬萊閣上浮金甌，身經萬變閱恢詭，可驚可愕歷悲喜，開拓心胸吞雲夢，萬卷紙上陳言耳，前有千古後萬年，日月出沒循海邊，鯤魚終得成鵬鳥，腐鼠何庸嚇鴟鴞，借爾奎光塔，發我登高興，大呼太白仙人同我遊，舉杯邀月驚詩聖，耳畔厭聽蒼蠅聲，餘子碌碌何重輕，市僧交歡良足恥，紛紛觸鬪與蠻爭，捫參歷井看

灌志文徵

卷十 七言古詩下

十二

未了，塔鈴爭和歸巢鳥，長嘯一聲出門去，月圓如鏡掛林杪，

奇義行

并序

游觀

光緒丙申，予春秋六十有四，幽居多暇，時繁江康子酌泉寓吾鄉永續菴，蓋如璋法師之良友也，予每過之，煮茗挑燈，共話永夕，適談曩年家居，友人王子邀我遊成都，與李少婦相值，其事特奇，非康子無以全李婦之貞，非李婦無以見康子之義，而又因王子構成，斯亦巧矣，此事不傳，且負上天陰隲下民之意，爰爲長句述之，名曰奇義行，還質康子，以著其實，語曰，德不孤，必有鄰，世亦有覽之而興感者乎，知不以予爲好事也，

予友康子繁江客，卓犖英姿豪放格，萬卷堆床不肯看，興來一月無遺冊，恥作尋行數墨儒，石上文章辟萬夫，慣將膽氣傾游俠，門前

常走霍家奴，年來已把前非改，胸中獨有豪情在，無那才奇遇亦奇，一行差可傳千載，昨霄爲語一奇遭，滿座咸欣意氣高，更經造物安排巧，其中難問一秋毫，此事不傳殊不可，毋乃天心屬在我，拈毫信手款款題，頓覺襟懷亦婀娜，云昔在家養病時，有友王郎舊所知，踵門邀我遊錦里，但道需殷不合辭，整裝向向蓉城走，事畢精神殊抖擻，孰意王郎情太癡，千金買笑分陪友，儂本殘軀痛悔人，要將妖艷近吾身，堅推未免形人醜，翦燭應堪語達晨，何期此女歸房久，斜背銀缸但垂首，嬌羞脈脈不一言，令我驚疑未曾有，留心諦視究行藏，不見濃妝見薄妝，袖底添將憔悴色，裙邊猶露舊衣裳，細思此女非無故，安得衷情爲我訴，無如三喚不肯前，殆將我作狂夫遇，我不先爲剖腹心，何來閨閣有知音，請君要把賢愚別，莫

灌志文徵

卷十 七言古詩下

十三

謂相逢盡誨淫，今霄此會非無愛，朋輩多情聊忍耐，君亦胡心若不堪，進退艱應有在，過渡同舟亦夙緣，此番遭際豈無天，請君綜舉從來說，我可爲君計萬全，君住何鄉本何姓，爲此生涯誰使令，馬逢伯樂一悲鳴，切莫無言徒自病，彼聞無語起徘徊，粉面初回淚滿腮，蓮步不禁風力弱，柳腰先已拂塵埃，朱唇半啓芳心露，但道君恩垂睠顧，儂本彭縣孤苦人，家在濛陽場後住，藁礎李郎在外多，爲人操作奈貧何，妾因獨處難爲業，意欲同夫共坎軻，豈知鄰媪心生計，爲言此處身工貴，遂將妾誘賣青樓，教儂覓死無其地，龜搗防妾情猶惡，撻罵頻仍並羈縛，今宵已誓死無生，實望逢人乞刀索，今君果欲出吾冤，地厚天高父母恩，妾夫見在王郎處，千萬勞君寄一言，我聞此言驚且喜，隔院呼王問所以，妒煞高唐雲雨心，夢

裏裏王亦驚起，摩挲睡眼認分明，直使王郎震且驚，咄咄大呼稱怪事，離奇翻覺異恆情，既而頓足復大叫，急道有天人豈料，傾箱出得贖身金，立地要予施計妙，儂於夙昔多舊遊，一呼百諾盡同仇，喚取搗龜鞭伏罪，捐金完璧不稍留，回房屬付歸裝製，但見李娘猶涕淚，釵鈿羅綺盡返伊，捉襟大有難爲意，看來貧女實堪嗟，救得身還體莫遮，囊底餘金何足惜，購將荆布送還家，

輓童春山

游觀

君不見青城仙人姚平仲，提戈誓欲扶衰宋，致教賊遁不成功，萬里西來歸碧洞，又不見制軍丁公出世姿，欲立偉績都江涓，萬金不惜石易籠，春波一漲隄爲夷，春山老兄本豪士，談心亦頗驚人耳，無如弓冶在斯人，徒作醬翁隱君子，我來敢謂知音者，論婚久慕墳篋雅，惠我何殊手足情，交遊滿眼如兄寡，容齋親家真吾儔，點額歸來氣尙道，方思奮翮爲兄慰，誰料兄先正首丘，兄今信脫人間屣，教余灑淚歌蒿里，冢君病軀當若何，愛弟功名惡可已，

撒秧歌

陳經

君不見清明過後穀雨前，絲絲微雨杏花天，看來民事不可緩，農人叱犢犁新田，田將平兮先泡穀，每畝量穀升有六，簸之揚之稗秕除，淘之汰之得堅粟，粟下缸兮纔到水，兩日一夜露芽嘴，漉在筐中黃纍纍，撒在田中綠每每，撒歌秧，歌撒秧，惟願朝朝有太陽，秧立針兮好曬水，滿月而後秧生長，插遍東西南北疆，

兩翁行贈羅丈烈堂陳丈稼書

周兆熊

我生素不解吟詩，偶得名詩便賞奇，奇至陳羅兩翁極，兩翁均有吟

詩癖，左手推敲右撚髭，百戰神酣老不知，窗前盈案復滿囊，分乞
數箋療饒腸，攜歸豪誦聲轉疾，喁喁隱動鬼神泣，悄置齋頭不敢窺
，奇光直射蓬萊閣，蓬萊仙子盡耽吟，邀得二仙挾詩心，二仙評議
久弗止，餘霞散作空中綺，紛拿雲上語咻咻，造物老人笑不休，謂
昔智珠藏玄圃，兩翁忽效蟠桃偷，偷服胸中明似燭，詩心反啓仙衝
突，重罰兩翁警後來，日教心血嘔百回，耄歲成詩同衛武，甲子遙
遙莫計數，

和陳稼書種竹歌

羅世勳

我之石友陳先生，蕭然塵表似竹清，不可一日居無竹，長歌種竹寄
其情，世人種竹竹以辱，先生種竹竹乃榮，髣髴虛心謙受益，同符
勁節操篤行，亭亭直上雪霜烈，瑟瑟橫空風雨驚，有林時掃七賢聚
，得徑常開三益迎，不與渭川矜貨殖，但須左右拂書楹，先生種竹
遺孫子，竹亦生孫相與成，我本俗人欲醫俗，且向先生乞數莖，種
伴松梅共高潔，歲寒三友締同盟，

青城吾邑名山垂老未嘗一遊賦此解嘲

羅世勳

壯哉青城輝梓里，盈盈只隔一江水，三十六峯晴更佳，宛若蓬萊瞻
尺咫，我生七十年有二，飄然素蓄凌雲意，更得名山作故鄉，胡爲
不識摩崖字，或云洞府羽流居，我是儒生各異趨，靈丹九轉非所習
，翺翔何必倩雙鳧，或云太史學成遊，我擁書城富比侯，典策高文
藏萬軸，白雲深處費羅搜，或云康樂恣遊情，我不窺園學董生，叢
桂留人芳已息，徒勞跋涉重行行，或云嘉耦艷天台，我則齊眉勝老
萊，堂下孫枝今復茁，油油厥草敷南陔，我聞宗子臥遊癖，天下奇

山張四壁，分明邱壑在丹青，狎翫煙霞隨墨客，我不遊山却愛山，雲嵐一幅任追攀，千巖迤邐藏幽勝，都在憑欄指顧間，我讀方輿紀載書，尊則五嶽險三塗，尺簡縱橫逾萬里，留題率爾輕操觚，我家藏有邑乘志，一百八景皆能記，寓目閒披甲乙編，福地洞天一齊至架陳緗帙壁懸圖，讀畫觀書似合符，笑我管窺一斑豹，稱心常覺景無餘，我今老矣足力衰，故紙堆中眼復開，暮暮朝朝接仙境，何須扶杖踏雲來，

索橋歌

郭仲達

上索橋，下索橋，兩橋相隔五路飄，風飄遙，雨飄飄，川爲長帶虹爲腰，我從橋上斯須立，天風簸蕩水怒號，神昏目眩心膽裂，橋不自搖人自搖，旁人語我神妙訣，東顧西盼心轉愕，昂頭直視信步行，王道蕩蕩無蹉跌，我聞此語真快絕，屢試皆驗慎毋洩，世間萬事敗遲疑，坐失事機空饒舌，請君寄語當道人，早把身家念斷決，莫到中流反蹙蹙，

聖廟與祭有感

郭仲達

聖廟巍巍天降康，水精之子曰素王，麟吐玉書鳳呈祥，尼山泗水遙相望，中有一人壽而昌，上繼羲軒與陶唐，制禮作樂修詞章，千秋萬載道統長，春秋祀事何輝煌，我來與祭亦堂皇，官吏濟濟趨復踰，峨冠博帶燦衣裳，升降拜跪獻酒漿，簋簋俎豆迄牛羊，戟門泮水影蒼茫，明星閃爍庭燎光，鐘鼓無聲夜未央，齋莊嚴肅寐不遑，滿城雞唱明東方，頒來胙肉旨且芳，家人婦子薦馨香，舉杯酌醴奉高堂，吁嗟聖澤真汪洋，

題靈岩紀異圖

劉璞

朝出灌城關，暮上靈岩山，靈岩山色好，孝意空中繞，河水下汪洋，孝子心且傷，傷心人不見，水雲拖白練，須臾欲斷流，不出任去留，同時復回首，仍覺濤聲吼，歸讀蓼莪詩，孝心無已時，君不見靈岩一路多靈異，只許孝子自來去，

登離堆望兩江

陸法言

伏龍潭上離堆立，伏龍潭下奔湍急，萬年不盡水東流，劈破鴻濛忽神泣，支分條達沃野成，十四郡縣無輟耕，當時神方鮮稱遠，歲久方知莫與京，六字心傳不可改，深淘低作流風在，後來不肯師古人，反使桑田變滄海，往歲飢驅曾駐役，濫竽未獻一籌策，今年捧檄來都江，偶思前事心增懣，成法萬古不可易，後來作者無紛囋，但

灌志文徵

卷十 七言古詩下 十七

願波平浪靜春水足，卽令官吏凍餒亦所欲，

游伏龍觀

尹謙

巉巖壁立壓西川，四面奇峯莫比肩，滔滔滾滾來西徼，湧抱青城浪接天，驅走龍蛇除民害，州縣十餘萬世賴，奔濤雷吼孤柱撐，劈開二江分內外，名號離堆水利度，秦蜀郡守李公鑿，六字昭垂遺法留，灘深淘兮堰低作，我來灌口睇從頭，偉烈豐功大禹侔，支分派別恩波遠，長此蒸民慶有秋，

石筍

在青城山中

伍彝章

萬峯林立插天矗，中有石筍森且綠，雲根瘦削霜苞肥，修篁壓巖葉蔽闔，五岳來朝丈人仰，先後與爭滕薛長，道人生恐驚雷化蒼虬，日持蓮鉢咒山頭，

題離堆龍潭

伍彝章

潮頭倒射三千弩，神勇驚傳破荒語，壯哉秦守鬪蛟虬，砭石劈山走雷雨，岷江水赤玉壘青，百靈萬怪駛奔霆，老龍知機甘蟄伏，閔雲扃霧口如瓶

離堆龍潭步伍玉雯韻

趙金鑑

急流倒駛捲強弩，中有老龍唾不語，喚起跨之雲中飛，紫蛇天半掣白雨，雨來茫茫大造青，綠龜赤鯉隨風霆，天公倘嫌鱗爪露，仍收雷電入寶瓶，

青城詩

宋育仁

綿岡隱天萬木蒼，毆溫轉谷爲深涼，封中雲騰龍虎氣，絕頂雪沐日月光，自應支阜孕鳴鶴，伊古訪道登軒皇，滄江南流畫衣帶，玉壘

灌志文徵

卷十 七言古詩下 十八

北走遙相望，昏旦暉陰一今古，堯年鶴起山靈語，蜀山舊治逮開明，玄圃神潛化玉京，汶阜之淵應井鬼，名山所掌無虞衡，容成元師似告謝，甯封龍躡蜚英聲，五岳真形自此出，天倉九室圖仙靈，秦時待我五而增，蓋號茲山屬道陵，管七二家封禪絕，漢四百歲玄學興，魏志釋老啓全真，唐祠宮觀相軒騰，別傳出世游方外，轉效西來寺度僧，五帝傳丹並傳寶，空同具茨伊稽道，夢斷周公孔演圖，例視道家嬪集老，聲賢同時弟若師，經子分流政教離，天將愛道賢人隱，雲不待族景曜虧，賣劍買牛那可得，登櫟椽蠹欲從誰，人天一判無涯涘，遺經搏垓知難至，羣向山居訪洞天，却認古冠爲羽士，輟徑洞門春草薰，磬聲只在上清聞，遊人到此極思返，豈有白雲持贈君，飛柯折輪掃車轍，阨頽欲墮崩雷駭，輪菌封岑虎跡深，乳

鐘淙澗龍湫黑，曠黃倒映半翠微，雲帶上浮純黛色，一線江流數點煙，平視羲和啟日出，直以聲聞當夢遊，只作耳觀無脚力，廻顧繩橋化險夷，賸欲捫羅縑幽絕，屐齒不到趙公山，蟠龍可望不可卽，探奇追感壯時游，誠知避世無仙客，

游青城常道觀經軒轅臺至朝陽洞望諸峯

宋育仁

昔聞丈嶽尊人五，衆山朝拱羅諸孫，軒皇總駕不可見，洞天再上星可捫，丈人乃反出其下，羣岡起伏如鴟蹲，恐是青溪鬼谷隱居處，道陵所師揆厥元，山半晴雲半爲雨，洞口朝陽晝已昏，擲槽擘山百靈服，天倉儲福萬騎屯，上清太上更在上，法授仙李蟠大根，吾聞廣成四萬八千歲，匹之住世七百非等倫，汶阜陂陀江出腹，屏山岸外還平陸，懸泉赴湖蒼蠅聲，涼風吹頂羣龍服，通洞翠微各一天，種

灌志文徵

卷十 七言古詩下

十九

藥玉田真萬族，傳聞正一謚明威，此屬重黎古職司，三皇創制流沙遠，來主茲山禮亦宜，九宮下行歸太乙，百世將來授帝期，錫名九室仙靈窟，平野一泓瀉山淥，木飢金穰歲爲秋，帝以會昌神建福，廣都玉女世已遙，金支翠華照山閣，曉起真靈朝太清，夜深天籟傳虛壑，樵柯爛去已千年，仙弈未終棋一局，千嶂還青化衛城，六時飛雨通閭闔，舒捲煙嵐爲洗兵，白雲終白潛神谷，

青城山

駱成驥

五嶽真形識欲徧，五嶽丈人晚相見，王母西遊生隱心，丈人東向示真面，真面蓮花天上開，瑤池作鏡玉爲臺，老君欲化三清出，黃帝先邀七聖來，道人不識人間世，自言山外無天地，閒數陰陽十八峯，坐忘道德五千字，歧櫻乳杏常風寒，裂石穿雲道路難，草長丹梯

隨鳳舉，花明玉洞入蛇盤，我是四重天上客，平生出入神仙宅，錦囊東貯赤城霞，鶴筆西披玄圃雪，玉真鳴鳳去悠悠，花蕊驚鸞不可留，偷閒偶共天師語，乘興長爲汗漫遊，經欲移家入雲住，雲中也有人知處，出岫無心雲自閒，萬里乘雲早歸去，

伏龍觀

賂成驥

岷山萬里如龍走，滿腹長江一開口，疊浪高連雪嶺翻，危灘怒作雷霆吼，東標玉壘西青城，約束無力任縱橫，神禹重生作太守，江山受命蛟龍驚，蛟龍倚作蜀江主，殄物殘民誰敢侮，然犀不信有溫嶠，仗劍寧知避周處，太守非神復非仙，民爾忘身誠動天，西收汶阜千年雪，東漑成都萬頃田，精神所注形骸改，鬥龍得雋神安在，更留神物守湔壩，不惜羣龍放滄海，巨靈高掌劈崔巍，離堆觸江江倒

灌志文徵

卷十 七言古詩下 二十

迴，但教低堰彎環在，自有長江渾浩來，荷插決渠降雲雨，且漑且糞長禾黍，區區鄭百何足論，天地同流與終古，太守一去江水孤，老龍無事眠抱珠，飛樓湧殿壓江水，椒漿桂酒神歡娛，霓旌翠蓋紛紛下，太守來時龍作馬，喜見梁州斥鹵田，盡成上上膏腴野，

都江堰舊有安爛繩橋戲爲此作

宋治安

西山砍竹驚山魘，編竹爲龍龍爲橋，跨江鱗甲欲飛舞，橋不動搖龍自搖，山雲作勢鎖其尾，舉動更吸山西水，長板嵌空作龍脊，行必踏龍龍不死，我來落日羣山高，滄江日暮鼉鼉號，遊人競渡欲歸去，攀鱗偃僂如猿獠，橫空我欲跨龍背，龍自升騰震肝肺，一步一搖龍欲飛，咳唾驚龍龍不退，我狂自笑我還癡，是龍是橋都未知，老蛟怒走靈龜泣，與龍作勢紛相持，吁嗟乎，西江白浪時澎湃，天遣

龍歸壓羣怪，昨宵雷雨挾龍行，憑夷擊鼓山靈拜

青城丈人峯

宋治安

秦皇鞭山山不走，巨靈劈之山愈陡，中有一峯瘦如人，仰指中天懸北斗，丈人峭立羣山低，兒孫膝下供奔馳，二峨顛倒俯不起，天教一角留西陲，我來欲向丈人拜，山靈笑我多狂怪，萬山糾屈蛟龍僵，我身直在青天外，九州五嶽何平平，我揖丈人還自驚，靈鼈負戴皆培塿，何須跨海填滄溟，丈人低回視我語，欲遣山靈捲風雨，大呼三十六峯雲外來，兩腋飄飄自飛舉，

青城歌

蔡桐君

青城三十六青峯，乃是天上丈人所種三十六朶青芙蓉，一芙蓉內一洞天，中有仙人萬萬千，其餘靈光不知處，化作天師古洞雲飛鸞，

灌志文徵

卷十 七言古詩下 廿一

灌口繩橋行

王秉鍾

江流峽束舟難行，人工極巧將天爭，山民溜筒既叫險，野老獨木仍防傾，喚起班爾關奇製，意匠慘澹重經營，飛纜虹牽棧高閣，皮板鱗密浮重瀛，東西交連石砥柱，左右偪仄闌遮橫，曬網晾帛酷相肖，輿梁徒杠應等名，試問修造始何日，追溯嘉慶年分明，羅浮山人抱利濟，諮訪疾苦來青城，爲憫攀登隔彼岸，因憐跋涉艱前程，規占地勢迹湮址，扼據津要蘇困岷，九行王道各分列，千鈞一髮交錯衡，洪濤滾滾足邊走，素練幡幡空際呈，行商居賈不病涉，臨流昔險今夷庚，沉犀比方烈豈讓，駕鼉推廣功尤宏，遂令湔壩化天塹，還看寶睽徭帝京，范錄吳船可復補，坡詩蜀道堪重賡，蒼桑迄茲幾代嬗，歲歲修復新陳更，延陵遺愛永不朽，江上時聞流水聲，

贈菊花天主人

蔡培基

既不能弋取人間好富貴，占盡東風豪華氣，又不能綽約秀似水中仙，清寒長傍石頭眠，英雄固各有懷抱，一花一木皆情牽，我愛謝氏菊花圃，四面短垣無門戶，旁堆怪石骨峻崢，苔蘚潤滑初過雨，舊栽名花數百株，星羅雲布影模糊，孤芳晚節香不艷，肯受塵埃半點污，紅紫染成胭脂片，一任秋風色不變，中藏白玉嵌玲瓏，恐是冰霜來煅煉，其餘佳色不勝名，夔龍佛座最堪羨，長栖籬下人不知，惟我與花常識面，欲飲菊花酒，恰逢愛花人，花亦清瘦飽霜老，倔強不受人憐貧，崖穴藏身甘隱逸，不隨流俗爭得失，頻年無事度春秋，泉石膏盲煙霞疾，繁華歲晏有枯榮，此花秋至尙叢生，幾莖傲骨撐天地，知心惟有陶淵明，晉時去今數千載，炎涼變幻心不改，

灌志文徵

卷十 七言古詩下 廿二

我來對花亦太息，同調更有幾人在，東山謝君最好客，昨日邀我到彭澤，談經縱酒氣更豪，日暮斜陽透離隙，曦輪停御月瞳朦，酒軍大敵鑿秋風，一勝一負不相讓，主人酤酒疊呼童，如此歡會豈易得，菊花亦醉含笑色，四圍相映皆鮮明，花譜評章真絕特，質性淡泊本天定，得我諸人亦添興，相對如何遍出塵，執此問花花不應，酒醒方知世上情，紛華靡麗俱無成，此花冷落無人見，不須穠艷競浮名，歲月消磨衆華死，精神百倍開未已，我生只願百年三萬六千日，長與菊花結知己，

讀灌江考長歌一首

王夢蛟

道人惠我灌江志，江枯作堰法詳記，水從岷腹向東來，總歸灌口辨經緯，開鑿離堆繼禹功，一支北注分爲二，寶瓶入口浸成都，百萬

民田資水利，入細憂涸泛憂滂，消納堤尖作人字，淘灘須深但水盈，作堰務低防水恣，窮冬築堤濬江心，六十日程堰工備，放閘必待立春餘，時早秧針愁水匱，堰成巨石安竹籠，水激歲修當易治，李王父子廣濟心，良法昭垂憂曠廢，立石重鐫六字碑，鬼羅眉列勤編次，前人既苦構堂基，務飭垣墉塗茨墜，老去更爲來者憂，舌敝唇焦屬三四，何由具此悲憫懷，是佛是仙同一意，我治儒書無寸功，飽飯安眠忘所自，讀罷斯篇三歎嗟，滿腔生意縱橫肆，願分道者心，徧贈西川吏，民飢卽我飢，民事吾家事，君不見香火道人且有情，何況官厨日日民膏飶，

牌坊岡仿古樂府弔徐開龍

周思晉

丈夫屈節生，何如慕義死，死爲義士亦足矣，解一君不見徐開龍，率丁

灌志文徵

卷十 七言古詩下

廿三

堵賊賊如蜂，從者四竄剩一龍，解二一賊爭前鬪，羣賊截其後，孤身敵賊如困獸，呼天欲乞山靈救，解三我力告竭，我馬告仆，丈夫可殺不可屈，掀髯怒罵奮臂擊，飲刃而終如甘蜜，解四孔曰成仁，孟曰取義，大書特書八大字，我來欽英風，懍懍有生氣，解五嗚呼徐義士，目不識丁，乃能如此，掀翻廿一史，屈節多少讀書子，何必讀書良有以，嗚呼徐義士

題天師洞唐碑

周思晉

開元天子號神武，河山破後霖鈴語，生把皇圖換美人，沈香亭北酣歌舞，一捻方傳妃子紅，三搗早動魚陽鼓，六軍萬里幸西川，廻鸞南內猶淒沮，何意名山賴主持，詔書遠下息侵侮，二千年來神獨完，此碑猶是唐時土，揮洒古意莽淋漓，軒跳昂躑盤龍虎，想當奮臂

疾書時，珠花亂落飛毫楮，摩挲宸翰感前朝，浯溪有碑書顏魯，靈武中興頌甫成，後儒刺刺多攻忤，一家父子授受恩，黃袍手著冤千古，卽觀蠱惑遷上皇，此是官家昧靈府，魯公拜表請朝天，君闕猶思臣可補，惜無前行非前非，碑如能言應見許，流連往事嘆夕陽，願言再告名山主，名山自古重名人，此碑岫巒侔神禹，雲烟磨滅世所悲，休教剝落淪風雨，

烏啼行

寧濤

風淅淅，雨淒淒，雄鳥不歸雌鳥啼，憶結巢，在柯枝，頡頏高下不相離，聞說南山多種豆，奮翼欲往南山就，南山雖好是他鄉，何爲淹留歲月長，飲啄風波多不愼，一朝遂沒南山旁，吁嗟乎，雄鳥斃，雌鳥悲，窩中兒女尙未飛，含情欲向青天訴，青天亦不知其故，

灌志文徵

卷十 七言古詩下 一二十四

伏龍觀

仰光溥

岷山萬里留晴雪，春夏消融天柱折，驚風吹入滿江橫，千重白浪迸東傾，鯁鯁鱗鱗皆得勢，青天突兀春雷鳴，聞說此中有龍潛，鐵鎖於今不計年，神禹而還有秦守，功力用之能廻天，其初旱澇常迭見，崖截江分勢易變，君不見離堆高聳入青雲，史述河渠蜀郡聞，十四屬民咸利賴，祇今留有六字心傳之奇文

長生宮懷古柬徐春山張伯庸周之德三道士

朱谷暘

雙鵝掠地飛洛陽，五胡亂晉國幾亡，草澤中有英雄起，曰特曰雄皆軒昂，李流一軍適飢困，范賢何故齎與糧，世說昭烈曾賓禮，封拜逍遙義弗忘，三馬業已同槽食，二士何敢犯我疆，用謀空費姜伯約，代庖纔學張子房，權借成人一臂力，恢復漢業希富強，自我思之

殊不爾，當時冥冥早翱翔，梁鴻尙不因人熱，逐馬豈必借生羌，養人害人古有戒，納米退寇謀則臧，羅不庇民特致禮，難驅赤子當虎狼，天地大師供一笑，肯以貂蟬污鬢霜，神龍見首不見尾，至今祠宇猶輝煌，偶逢歲首頗閒暇，遠來瞻禮一瓣香，安得二三道友同登覽，鶴巢亭上樂徜徉，

丈人峯

馬蓮舫

青城之峯高插天，寧老棲息以延年，軒皇訪道幾時至，丈人名號於今傳，五岳真靈同受詔，每月朝謁皆班聯，玉匱遺書太荒渺，三十六峯長屹然，人間仰望不可卽，神鸞欲下獲盤旋，龍鍾拄杖有時笑，兒孫羅列知幾千，試問山靈默不語，位置想在懷葛前，遠視靈巖近大面，巍然獨立凌蒼烟，

灌志文徵

卷十 七言古詩下 廿五

惑懷

楊夢濤

天地生人都一例，得志便有豪雄氣，或將或相或公侯，三尺青鋒無不濟，有時叱咤君王前，五步血流觀者悸，有時吐氣貫長虹，天上星辰爲之易，有時懷彼博浪椎，副車一擊祖龍避，有時高臥草廬中，三顧已籌天下計，有時醉吟詩百篇，僕遣臣僚等兒戲，無如所生不自全，坎坷命運實由天，本是旋乾轉坤手，吹簫吳市乞人憐，本是黃金台上客，偏來跨下受人冤，磨勵人豪節堅苦，恢弘國士量深淵，君不見北溟有海原非小，中有鯨魚人未曉，一日化鵬天地寬，扶搖直上清虛表，又不見蛟龍生來不遇時，泥中鱗甲養遲遲，有時得際風雲會，揚鬚鼓鬣笑天低，

奎光塔

易履謙

青城襟帶岷江水，江水滔滔疾如矢，水既東馳不復歸，狂瀾誰作中流砥，古有塔立青城東，當住江濤萬頃風，無何馮夷盜塔入海去，如從天外摧長虹，至今瓦礫埋荒草，滿地蒼煙春不掃，枯蘇頽後夜烏悲，遺跡蒼涼誰探討，濂溪老子桂林來，天香願與青城栽，披將女媧五色石，補此黃金百尺台，鳩工庇材剛一載，轉眼江邊見鬼磔，遠壓毒龍不敢號，從此又填精衛海，世人徒詫阿育王，八百四千誇荒唐，何如此塔一舉足千古，能分天上奎宿光，塔巔隱隱穿雲過，呼吸想應通帝座，安得乘風直上塔之巔，下視齊州九點烟，

銀杏歌

無名氏 別號老鶴

天師洞前多老林，中有銀杏氣蕭森，大逾十圍高百尺，孤根下蟠九淵深，拔地參天形古怪，神物不知始何代，道士但云已千年，蒼蒼

灌志文徵

卷十 七言古詩下 廿六

獨餘古時黛，奇倔直似六朝松，枝頭常有白雲封，凡鳥惡禽不敢巢，夜深往往鳴天風，獨恨遊人少題詠，肉眼不識孤高性，李子一歌差足傳，墨痕淋漓輝石徑，從來奇物翻逃名，獨立空山神不驚，無用之用始大，不材亦任俗人評，年年洞口飽霜雪，生有奇骨那能折，地老天荒不改柯，鬼神呵護皆臆說，世人但知秦岱松，此物靈異將勇同，歌罷繞樹三太息，如此婆婆老樹無人識，

遊離堆拜謁二王廟登老君山絕頂

無名氏 別號老鶴

朝來步出城南橋，宿雨初霽紅埃消，煙波茫茫一縱目，江聲山色相招邀，旗影翩翩指隔岸，農事有場經試驗，中西佳種既紛羅，十畝桑陰綠一片，沿江煙樹河參差，行行來謁太守祠，金榜銀題宮闕壯，遺像清高閃靈旗，祇今蜀人祀芬苾，尙想神功開闢日，六字心傳

鑿千秋，西川奇功真第一，忽聞殿足走風雷，石破天驚古離堆，沈
沈下有蛟龍窟，疏鑿鎮壓何神哉，觀瀾亭上聯小憩，摩挲試讀殘碑
字，天風浩蕩吹水立，對此躊躇真滿志，坐久復尋舊路還，躡衣更
上玉壘關，憑闌四顧何空闊，置身已在岷閬間，峯回湧出二王廟，
金碧樓臺光照耀，樞衣偃僂拜神君，萬年香火留山嶠，巖穴聖水何
清冷，龍池一噴復一醒，道人烹茶笑勸客，云此勝飲甘露馨，盤空
屹立老君殿，到此山別開生面，下視雙江走白龍，源頭活水真親見
，平生此遊快非常，忽驚世變感桑滄，橫流倒灌徧東亞，隻手誰挽
百川狂，凌風我思秦太守，赫濯聲靈昭灌口，安得乘鸞下九霄，回
瀾一施霹靂手，古人不見空徘徊，且醉生前酒一杯，數聲鐘磬夕陽
晚，天風送我下山來，

灌志文徵

卷十 七言古詩下 廿七

與劉大令遊離堆

蕭湘

一塊石，數千年，經斧斷，枕江眠，洪濤巨浪撼不動，巍然孤高聳
青天，宮觀玲瓏耀金碧，樓臺隱約鎖蒼煙，倚檻俯聽蛟龍吼，奔騰
澎湃水勢陡，更有象鼻何崢嶸，倒挂懸岸驚百醜，我來離堆遊伴我
使君劉，邀劉更上西亭住，四面雲山一望收，

檄赴灌縣勘堰歸途迂道游青城長歌紀之

官維賢

瘦蛟踏破馮夷宮，洪濤橫決聲隆隆，長堤甃鐵須臾壞，滄海倏注桑
田中，菲屋逐波慕漂骨，嗷嗷百里鳴哀鴻，莅民無術召氛稜，戕害
胡不丁微躬，流涕拜書乞大府，頒帑莫拯閭閻窮，羊牢不補患未已
，將無膜視吾民恫，大防復完勢難緩，深淘低築資神工，冬官失職
亦已久，水衡况復厄司農，勉剖心肉補瘡痍，鳩資仍以租庸充，單

騎輕裝來灌口，驚見波底眠殘虹，怒湍水倒落籬撤，射走難齎錢鏐
弓，計工百日繕百萬，衆擎力障百川東，含詞具牘重籲請，伐竹
籠石期程功，公餘偶著游山屐，青城魂夢久爲通，好客不自上床臥
，偕行幸有陳元龍，山石犖确梯百級，松懸十圍吟天風，巖壑幽還
地負絕，清泉碎玉聞琤琮，琳宇山半踞腰腹，飛楹危棟塗青紅，羽
人迎客貌閒野，導我一一留行蹤，崖碑漫漶不可讀，參天直上雙歧
櫻，池水清冽鑑毛髮，隕石突兀撐青空，多竹生寒中衣袂，秋末往
往似隆冬，鋪床小憩具鷄黍，酢酬談笑開心胸，山靈胡爲拒俗吏，
病魔逐客來相攻，呻吟竟罹河魚疾，三遺頽倒廉頗雄，倚枕不寐坐
待旦，射牕曉日光瞳瞳，仙人有藥不敢飲，對案無力舖朝饗，仰企
絕頂徒悵望，飛躋不復勞雙筇，揖別下山就歸路，清游來去何匆匆

灌志文徵

卷十 七言古詩下 廿八

，回首靈宮渺難覩，晴雲擁出青芙蓉，

古銀杏歌

李善濟

天師洞前有銀杏，羅列青城百八景，玲瓏高出白雲溪，蒼翠橫鋪孤
鶴頂，我來樹下久盤桓，四面陰濃夏亦寒，石謁仙蹤今已渺，班荆
聊當古人看，故國從來豔喬木，况甘隱淪絕塵俗，狀如虬怒遠飛揚
，勢如蠖屈時起伏，姿如鳳舞雲干霄，氣如龍蟠棲巖谷，盤根錯節
幾經秋，欲考年華空躑躅，黃帝來時已萌芽，明皇西幸滿著花，洞
天竅竅應八節，七十二候不須除，其下別有日月分精照，龍光萬丈
燦如霞，我聞草木均有向日性，胡爲鍾乳倒懸相掩映，又聞大塊元
氣供吸收，胡爲滋養千年尙未盡，老幹迄今獨超羣，山色猶封秦漢
雲，天倉三十六峯緜亙數百里，千巖萬壑盡兒孫，延年惟有林泉樂

，堪笑丈人觀裏牡丹號將軍，君不見未央宮闕長生殿，棟梁都隨滄海變，

灌志文徵

卷十

七言古詩下

廿九